

Bouônjour bouonnes gens, ch'est Alex Card tch'a l'pliaîsi d'vos présenter La Lettre Jèrriaise aniet, lé vîngt-deux d' Août, deux milles vîngt-quat'.

Eune lettre Jèrriaise hardi îimportante pour mé, car ch'est ma preunmié lettre Jèrriaise. J'ai d' la chance pa'ce qué jé d'meuthe au Sud dé l'Espangne, dans la belle région d'Andalousie, tère dé la dans'sie dé Flamenco et d'la mangnifique [tchuîsinne](#).

Et don, jé c'menchis à penser: Tch'est qu'i' sont les lians entre Jèrri et l'Espangne? j' décidis d' faithe des r'cherches.

Preunmiéthement, i'y'a d's articl'yes êcrits entouor les pus d' mille chîn chents prisonnièrs républyicains Espangnos tchi 'taient condamnés à faithe les travaux forchis sus l's Îles dé la Manche duthant l'Otchupâtion, sustout en Aur'gny.

Châque année un hommage est organnisé par Gary Font, lé fis dé Francisco Font, iun des républyicains tchi s'installit en Jèrri quand la dgèrre finnit.

Auprès ch'na, j' trouvis dans l's archives des gâzettes Espangnoles pus d'réféthences entouor d'aut' pèrsonnes dé l'Espangne tchi, pour difféthentes raîsons, d'meuthaient en Jèrri. Notamment dans eune édition d' la gâzette d' Extremadura, tchi pâle dé pèrsonnages politiques tchi chèrchaient un abri duthant lé dgiêx-neuvième siécl'ye à cause dé la persétchution du rouai Fernando VII (lé septième). Jèrri, eune pliaiche libérale en chu temps-là, est pus connu pour abriter difféthents êmigrants comme Victor Hugo, mais ou savez qué jusqu'à quat' chents Espangnos d'meuthaient en Jèrri d'pis mille huit chents vîngt-six quand la colonne Espangnole dé Somers Town à Londres, èrmuit dans l'Île.

Des grosses têtes coumme Pablo Montesino trouvîtent du run pour travailli sus lus oeuvres. Montesino, tchi fut élu comme député dé Extremadura en 1822 'tait un grand pedagogue Espangno et il êcrivit san preunmié livre "Les nyits d'un êmigrant" en Jèrri. Nou peut liêthe d'aut' noms î importants coumme Ignacia González Alonso, tch' êcrivit un traité hardi întérrêssant tch'a nom "L'agritchultuthe en Jèrri" et tchi raconte coumme tchi qu'i' vivaient les Jèrriais.

Finnalement, jé n' peux pon finni ma lettre Jèrriaise sans pâler d'eune légende dé l'île! J' vos pâle entouor la légende des Navithes Espangnos.

S'lon la légende, à la fin d'l'année 1495 eune grand' tempête s'abattit sus les Grèves dé St. Ouën duthant trais jours et trais nyits. La traîsième séthée la tempête mollit et un groupe d'piliers pûtent vaie chîn grands navithes Espangnos à la d'rive, et tchi donnaient des sîngnaux d'dêtresse.

Les pilieurs savaient bein qu' les navithes d'vaient êt' chèrgis dé trésors don il' attendîtent tch'i' fûssent naûfragis sus les grèves pour pouver les pilyi. Il' alleunmîtent des feurs sus la grève où'est qu'i' y'avait des rotchièrs. Les batchieaux pensaient qué ch'tait là lé havre et i' tchiyîtent dans l'piège.

Quat' des navithes coulîtent et tout l'monde fut n'yé. Mais sus la chîntchième navithe, y'avait un vièr homme et une janne fil'ye. L'homme plaidait auve les pilieurs mais i' n' les aîdgîtent pon et les louêmes avalîtent les Espangnos.

L'homme maûdit toutes les gens tchi 'taient là

Un an auprès, les pilieurs 'taient sus la même grève, célébrant qu' la malédiction né fûsse pon arrivée. Mais, soudainement, eune tempête s'arrivit et ou c'menhit à détruihe tout, et les gens n' pouvaient pon s'écapper. Mais d'avant d'mouothi i' lus semblyit d'apèrchéver un fantôme dé navithe échoué sus l'rotchi auve un vièr homme à bord! Tchille hôrreu, m's anmîns!

Eh bein, j'crai qué ch'na suffit pour aniet. Jé n' veurs pon vos donner des ponsereuses, mé. Mercie pour m'aver êcouté, et à la préchainé!